

*Prins Willem van Oranje beveelt zich aan in de vriendschap der staten van Utrecht en belooft hen in alle zaken met raad en daad te zullen bijstaan.*

Eerwaardighe etc.

Alsoe d'edele ende erentfeste joncker Willem Pyl, brenger deses, hier sekeren tyt by den staten geweest synde, ons verclaert heeft, in meeninge te wesen, wederomme by UE. te vertrecken, hebben niet kunnen laten UI. dese te schryven, om ons in alle vruntschap aen UI. goede gratie te recommanderen, ende meer en meer te betuygen die goede genegentheit ende affectie, die wy altyts tot uwer ende 's lants welvaren syn dragende, waeromme wy noch voortaeue, eenpaerlick sullen continueren, alsoe langhe, als Godt ons in 't leven sal gesparen, zulcks wy hertelicken bidden U te willen versekeren, ende ons ganscheliken toe te betrouwen, selfs dat wy allen middelen soeken sullen, om UI. van de groite ende swaere lasten te ontslaen, daer ghy u jehenswoordelick inne syt bevindende, mitsgaders in allen anderen saecken subvenieren ende behelpen, daert ons enighsins moghelyck zal zyn, verhopende alle 't selve mitter daet jegens UI. allen, so wel int generael als int particulier, te bewysen, zoeder eenighe occasie, om sulcx te doene, sal presenteren. Biddende hiermede God almachtich Ulieden, eerwaardige etc. te gesparen in een lanckdurent ende voorspoedich leven, ons zeer hertelicken an UI. goede gratie gebiedende. Tot Dortrecht opten XVIII dach Aprilis 1577.

De prinse etc.

UI. goede vrint,

(get.) Guilliẽ de Nassau.

*Opschrift:* Den Eerwaardighe etc., den drie staten van den selve lande.

Recepta, 20 April 77.